

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ժ. Տարի, Թիւ 454, Ուրբաթ, 14 ՍԵՊՏԵՄԲԵՐ, 2018

ՀԱՄԱՅՆՔԱՅԻՆ

ՎԵՐԱՄՈՒՏԸ ՔՈՒԷՅԹԻ ԱԶԳԱՅԻՆ ՎԱՐԺԱՐԱՆԷՆ ՆԵՐՍ

Կիրակի, 9 Սեպտեմբեր 2018ին, վերանորոգ թափով եւ խանդավառութեամբ հնչեց Քուէթի Ազգային Վարժարանի 2018-2019 ուսումնական տարեշրջանի առաջին զանգը, ապա տեղի ունեցաւ դրօշակի արարողութիւն, որմէ ետք Տնօրէնութեան կողմէ բարի գալուստի խօսքեր արտասանուեցան, ինչպէս նաեւ բարեմաղթութիւններ կատարուեցան Քուէթի Վսեմաշուք Իշխանին՝ Շէյխ Ահմէտ Ճապէր Ալ Սուլպահին, որու գահակալութեան տարեդարձը կը զուգադիպէր վարժարանիս Վերամուտին: Ապա Տէրունական աղօթքով բաց յայտարարուեցաւ ուսումնական տարեշրջանը ու իւրաքանչիւր դաստիարակ իր դասարանը առաջնորդեց գեղեցիկ յարդարուած դասարանները եւ սկսաւ գործնական աշխատանքի:

Բարի եւ յաջող Վերամուտ Սիրելի՛ Ուսուցիչներ, կրթական մշակներ աշակերտ-աշակերտուհիներ ու ծնողներ:



www.aztarar.com

ՈՂՋԵՐԹԻ ԸՆԹՐԻՔ Ի ՊԱՏԻՒ ՔՈՒԷՅԹԻ Հ.Հ. ԴԵՍՊԱՆԱՏԱՆ Ա. ՔԱՐՏՈՒՂԱՐ ԵՒ ՀԻՒՊԱՏՈՍ՝ ՊՐՆ. ԼԵՒՈՆ ՊԵՏՐՈՍԵԱՆԻ



Չորեքշաբթի, 5 Սեպտեմբեր, 2018 ի երեկոյեան, Թեմիս Առաջնորդ՝ Գերշ. Ս. Մասիս Եպսկ. Զօպուեանը, Արժ. Տէր Հօր ու ազգային մարմիններու ներկայացուցիչներու ընկերակցութեամբ, գլխաւորեց Քուէթի Հ.Հ. Դեսպանատան Ա. Քարտուղար եւ Հիւպատոս՝ Պրն. Լեւոն Պետրոսեանի Քուէթի մէջ իր ծառայութեան շրջանը աւարտելուն առիթով, ողջերթի ընթրիքը, որուն ներկայ էր նաեւ Քուէթի մօտ Հ.Հ. Արտակարգ եւ Լիազօր դեսպան՝ Պրն Մանուէլ Բաղէյեանը:

Գերշ. Սրբազան Հայրը եւ ազգային մարմիններու ներկայացուցիչները, իրենց սրտաբուխ խօսքերը արտասանելէ ետք քաջատողջութեան եւ յաջողութեան բարեմաղթութիւններ ըրին սիրելի Պրն. Հիւպատոսին, որ անցնող չորս տարիներու ընթացքին ծառայեց Քուէթի համայնքին, որպէս համայնքի զաւակ եւ այդ իսկ պատճառով սիրելի դարձաւ բոլորէն:

Խօսքերու աւարտին, Գերշ. Սրբազան Հայրն ու Ազգային Վարչութեան ատենապետ՝ Պրն Մունիր Դարբինեանը համայնքի գոհունակութեան որպէս նշան, Պրն. Հիւպատոսին յանձնեցին խորհրդանշական յուշանուէրը:

Բարի երթ սիրելի Պրն. Լեւոնին:



ՀԱՅԿԱԿԱՆ

Արմեն Ռուստամեան. «Կասկածը Լաւ Վահան Է, Բայց Վատ Սուր, Անով Կարելի Է Պաշտպանուիլ, Բայց Կարելի ՉԷ Յարձակիլ»



12 Սեպտեմբերին «Առաւօտ»-ի լրագրողը ՀՅԴ խմբակցութեան ղեկավար Արմեն Ռուստամեանին հարցուցած է, թէ վարչապետ Փաշինեան զո՞վ նկատի ունէր, երբ ըսաւ, թէ իրենք զիրենք յեղափոխական ներկայացնող ուժերը գաղտնօրէն կը բանակցին ՀՀԿ-ին հետ, եւ թէ ՀՅԴ-ն նման բանակցութիւններու մէջ է հանրապետականներուն հետ:

Ռուստամեան պատասխանած է. «Նախ պէտք է դուրս ելլենք այս խորհրդաւորութեան դաշտէն, կասկածի մթնոլորտէն: Եթէ ըսելիք կայ, ըսէք

յստակ անուններով, ես պիտի չմեկնաբանեմ պարոն Փաշինեանի ըսածը կամ իր միտքերը»:

Ըստ Ռուստամեանի տպաւորութեան, ասիկա քարոզչական հնարք էր, որ հասարակութեան ուշադրութիւնը շեղի քաղաքապետական թեկնածուին անյաջող մեկնարկէն, որովհետեւ այն յայտարարութիւնները, զորս կատարեց Հայկ Մարութեանը՝ «սեւ ու սպիտակի բաժանումը», «մեզի դէմ խաղ չկայ» եւ այլն, քննադատուեցան, ու Փաշինեան կ'ուզէ ձեռով մը բեկում մտցնել այդ անյաջող մեկնարկին մէջ. «Ի վերջոյ խնդիրը այն է, որ մենք ոչ թէ քաղաքապետ կ'ընտրենք, աւագանի կ'ընտրենք, այլ այս քուէարկութիւնը աւելի շատ խորհրդարանի լուծարման քուէարկութիւն է: Մենք հարցը այդ դաշտը չէինք տեղափոխեր»:

Ռուստամեան հաստատած է, որ վաղուց Դաշնակցութիւնը արտայայտած է իր տեսակէտը՝ թէ պատրաստ է Ազգային ժողովի արտակարգ ընտրութիւններուն ու որեւէ խոչընդոտ չի տեսներ. «Ատիկա պատրաստ ենք ընել յստակ ճամբու քարտէսով, որ նորէն կիրքեր չբորբոքին: Կատարուի իսկապէս համախոհութեամբ», աւելցուցած է ան:

Լրագրողը կրկին հարցուցած է, որ ՀՅԴ-ն ճաշարաններուն մէջ ՀՀԿ-ին հետ հանդիպումներ կ'ունենայ. «Նախ պէտք է հասկնալ, թէ վարչապետին այդ տեղեկատուութիւնը ուրկէ՞ է, տեսած են, խօսակցութիւն արձանագրած են, թող հրապարակեն, մենք ալ գիտնանք: Եթէ տեսաձայնագրուած է խօսակցութիւնը, այդ ալ հարց է՝ ատիկա պատճառ կը դառնայ այլ հարցի: Թող հրապարակեն ու ըսեն, մենք որեւէ ձեռով աստոր հետ կապուած չենք: Կասկածը լաւ վահան է, բայց վատ սուր է, կասկածով կարելի է պաշտպանուիլ, բայց կարելի չէ յարձակիլ», հաստատած է Ռուստամեան:

Արմեն Ռուստամեան յայտնած է, որ ընտրակեղծիքներուն մասին Փաշինեանի ակնարկութիւնը ուղղակի յանցագործութեան մասին կը խօսի՝ աւելցնելով, որ լաւ պիտի ըլլայ ըսել որո՞նք են այդ անձերը, որոնք կ'ուզեն սահմանադրական կարգը տապալել՝ ընտրութիւնները կեղծելով:

«Կարելի չէ յայտարարություն կատարել ու այդպես մնալ: Այդ յայտարարության պետք է յաջորդեն քայլեր, պետք է շատ յստակ ըստ՝ որոնք են այդ դաւադիրները, ապացուցե՛ք, ու վերջացնե՛ք հարցը, այլապես մենք դեպի ո՞ւր կ'երթանք», հարց տուած է ան:

Արմէն Ռուստամեան հաստատած է. «Մենք՝ իբրեւ քաղաքական ուժ, ոչ ոքի աջակցութեան կարիք ունինք այսօր, մենք մեր ընտրազանգուածը ունինք, մեզի պետք է երեւանցիներուն աջակցութիւնը: Իսկ մենք բացարձակապէս կարիք չունինք այն աջակցութեան, որուն մասին կը խօսուի»:

«Հայաստանի Մէջ Սպիտակները Յաղթած Են, Իսկ Մեւերուն Պարտութիւնը Անշրջելի Է» Կ'ըսէ Նիկոլ Փաշինեան

Մայրաքաղաքի Դաւթաշէն շրջանին մէջ տեղի ունեցած «Իմ քայլը» դաշինքի քարոզչական հանրահաւաքին մասնակցած վարչապետ Նիկոլ Փաշինեան իր ելոյթին մէջ անդրադարձած է երեքշաբթի, 11 Սեպտեմբերին հրապարակուած Ազգային անվտանգութեան ծառայութեան (ԱԱԾ) եւ Հայաստանի Յատուկ քննչական ծառայութեան (ՅՔԾ) ղեկավարներու հեռաձայնային զրոյցի գաղտնալսումներուն, զորս ան որակած է «դաւադրութիւն եւ յանցագործութիւն Հայաստանի Հանրապետութեան պետականութեան նկատմամբ»:



Փաշինեան յանձնարարած է ԱԱԾ-ին ու ոստիկանութեան՝ «ամէնէն կարճ միջոցին յայտնաբերել դաւադրութիւն կազմակերպողները եւ ենթարկել խստագոյն պատասխանատուութեան»: Ըստ անոր, բոլոր չակերտաւոր յատուկ ծառայութիւնները, ապօրինի զինուած խմբաւորումները պետք է յայտնաբերուին եւ ոչնչացուին՝ «զանոնք պետք է պատկեցնել ասֆալթներուն վրայ ու զինաթափել»:

Քարոզարշաւի իր ելոյթին մէջ Փաշինեան նաեւ ըսած է. «Ռոպերթ Քոչարեան եւ Սերժ Սարգսեան, դուք որոշած էք մարտահրաւեր կարդալ Հայաստանի ժողովուրդին: Ուրեմն՝ մարտահրաւերը տեսէք: Մենք ունինք Ազգային անվտանգութեան ծառայութիւն ու ոստիկանութիւն, եւ ես երկու ծառայութիւններէն կը պահանջեմ երկու ժամուան ընթացքին կարգուկանոն հաստատել ամբողջ հանրապետութեան տարածքին եւ երկու ժամ ետք ներկայացնել արդիւնքները»:

Ըստ «Երկիր»-ի, հրապարակային յանձնարարականէն երկու ժամ ետք ուժային որեւէ կառոյց չէ ուզած մեկնաբանութիւն կատարել, թէ ի՞նչ արդիւնքներ կան: Վարչապետն ալ լուռ մնացած է այս առնչութեամբ: Ոստիկանութեան եւ ԱԱԾ-ի լրատուական ծառայութենէն թերթին յայտնած են, որ հրապարակելի որեւէ նիւթ չունին: Վարչապետ Փաշինեանի մամլոյ քարտուղար Արման Եղոյեան հաստատած է, որ ճշդուած երկու ժամուան ընթացքին զեկուցումը ներկայացուած է, սակայն մանրամասնութիւններ չէ յայտնած: Լրագրողներուն հետ ունեցած զրոյցին ընթացքին

Փաշինեան եւս չէ ուզած այս գծով իրեն ուղղուած հարցումին պատասխանել՝ ըսելով, թէ ամէն ինչ զեկուցուած է, ամէն ինչ կարգին է, արտաքին միջամտութիւն չէ տեսած հոս:

Նոյն հանրահաւաքի ընթացքին Փաշինեան խօսած է Սերժ Սարգսեանի ու Ռոպերթ Քոչարեանի հարստութեան մասին եւ պայման դրած անոնց՝ կամաւոր վերադարձնել դրամները: Ալեքսանդր Սարգսեան, ըստ վարչապետին, դրամատան մէջ ունի 30 միլիոն տոլար: Փաշինեան խորհուրդ տուած է Սարգսեանին՝ կամաւոր կերպով այդ դրամները պիտոճէ փոխանցել:

Եթէ վարչապետին որեւէ բան պատահի, սակաւապետները եւ իրենց ընտանիքները տուներէն կը հանեն եւ ինքնադատաստանի կ'ենթարկեն, հանրահաւաքին ընթացքին յայտարարած է Փաշինեան:

«Անոնք չեն կրնար հասկնալ, որ ճիշդ է, եւ կ'ապահովեմ իրենց դէպի բանտ երթալը, եւ նաեւ իրենց անվտանգութեան միակ երաշխաւորն եմ, որովհետեւ եթէ ինձի բան մը պատահի, անոնց աւելի վատ բան կը պատահի՝ ժողովուրդին կատարմամբ», ըսած է Փաշինեան:

Ան յայտարարած է. «Հայ ժողովուրդին դէմ խաղ չկայ, Հայաստանի մէջ սպիտակները յաղթած են, իսկ սևերուն պարտութիւնը անշրջելի է: Հայաստանի մէջ սևերը ջախջախուած են, եւ անոնք այլեւս ոտքի պիտի չկանգնին: Երեւանի քաղաքապետի ընտրութիւնները սեւի եւ սպիտակի ընտրութիւններ են: Շատ ուժեր, որոնք իրենք զիրենք կը նկատեն ինձի օգնական, դաշնակից, ընկեր, անունը քռալիցիա կը դնեն, խաղեր կը կատարեն հակայեղափոխութեան հետ: Կոչ կ'ուղղեմ ո՛չ մէկ ձայն տալ հակայեղափոխութեան: Այս ընտրութիւններուն մեզի անհրաժեշտ է հակայեղափոխութեան անվերապահ անձնատուութիւն»:

Ան նաեւ յայտարարած է, թէ Հայաստանի մէջ ցարդ տեղի ունեցած քաղաքական ու հանրային հնչեղութիւն ունեցող բոլոր ձեռքակալութիւններուն պատասխանատուութիւնը կը վերցնէ իր վրայ:

Փաշինեան. «Իրենք Զիրենք Յեղափոխական Յայտարարած Որոշ Ուժեր Կը Բանակցին Հանրապետականին Հետ»

Երբեքունի թանգարանին դիմաց 10 Սեպտեմբերին «Իմ քայլը» դաշինքի հանրահաւաքին ընթացքին արտասանած իր խօսքին մէջ վարչապետ Նիկոլ Փաշինեան խօսած է քաղաքական ուժերու մասին, որոնք, ըստ անոր, իրենք զիրենք իբրեւ յեղափոխական կը ներկայացնեն, սակայն կը փորձեն ՀՀԿ-ի հետ թաքուն համաձայնութեամբ տապալել յեղափոխութիւնը:

Ըստ անոր, կան քաղաքական ուժեր, որոնք իրենք զիրենք կը ներկայացնեն իբրեւ յեղափոխութեան պաշտպան, առաջամարտիկ, եւ այսօր գացած խորհրդարանին մէջ, ճաշարաններուն մէջ եւ այլ տեղեր կը բանակցին հանրապետականներուն հետ: «Կ'ըլլա՞յ, որ դուք այս ընտրութիւններուն ձեր ընտրակեղծարարական միջոցներով մեզ պաշտպանէք, մենք ալ երբ յաղթենք քաղաքապետարանի ընտրութիւններուն, այնպէս կ'ընենք, որ խորհրդարանական արտակարգ ընտրութիւններ տեղի չունենան, որ դուք քանի մը տարի ալ պատգամաւորական աթոռ ունենաք», յայտնած է Փաշինեան:

Վարչապետին համաձայն, ասոնք այն ուժերն են, որոնք միայն յեղափոխության յաղթանակէն ետք միացան յեղափոխութեան:

«Կը յիշէ՞ք, երբ Հայկ Մարութեան իր ելոյթներէն մէկուն ընթացքին խօսեցաւ սեւերու եւ սպիտակներու մասին, եւ այդ յայտարարութիւնը մեծ աղմուկ բարձրացուց, անկեղծ ըսեմ, ես ըսի՝ Հայկ ջան, եկուր այդ սեւ-սպիտակը թողնենք: Բայց կարծես Հայկը բան մը գիտէր այդ ատեն: Ինչո՞ւ կ'ըսեմ ասիկա, որովհետեւ այսօր Երեւանի քաղաքապետի ընտրութիւններու պարունակին մէջ կան քաղաքական ուժեր, որոնք իրենք զիրենք կը ներկայացնեն իբրեւ յեղափոխութեան պաշտպան: Յեղափոխութեան յաղթանակէն ետք իրենք զիրենք յայտարարեցին ամենէն թունդ յեղափոխականներ, իսկ մինչ այդ յեղափոխութեան դէմ կը խօսէին», յայտնած է Փաշինեան՝ անելցնելով, որ հրապարակաւ յեղափոխութեան մասին խօսելով՝ նմանները կը փորձեն զաղտնօրէն տապալել զայն: «Պիտի չըլլայ, ձեզի կը սպասէ ջախջախիչ պարտութիւն, որովհետեւ ժողովուրդը ձեզ պարտութեան պիտի մատնէ: Սթափեցէ՛ք», ըսաւ ան:

Հրապարակուած է ԱԱԾ Տնօրէնի Ու ՅՔԾ Պետի Հեռաձայնային Զրոյցին Գաղտնալսուած Ձայնագրութիւնը

Երեքշաբթի, 11 Սեպտեմբերին Հայաստանի հասարակութեան հրամցուեցաւ անօրինական, գայթակղալի հրապարակում մը, որ մեծ աղմուկ ստեղծեց հանրապետութեան մէջ:

Արդարեւ, «Եւրօխուպ»-ի վրայ հրապարակուած է ձայնագրութիւնը Ազգային անվտանգութեան ծառայութեան (ԱԱԾ) տնօրէն Արթուր Վանեցեանի եւ Յատուկ քննչական ծառայութեան (ՅՔԾ) պետ Սասուն Խաչատրեանի միջեւ տեղի ունեցած հեռաձայնային քանի մը զրոյցներու:

Ըստ ձայնագրութեան, խօսակցութիւնը Հայաստանի նախկին պաշտօնեաներու, «Մարտ 1»-ի գործին, Ռոպերթ Քոչարեանը կալանաւորելու, Հաւաքական անվտանգութեան պայմանագիրի կազմակերպութեան (ՀԱՊԿ) քարտուղար Եուրի Խաչատուրովը կալանաւորելու վտանգին, փաստաբան Վահէ Գրիգորեանի կողմէ սպասուող գրառման, պաշտպանութեան նախկին նախարար Սէյրան Օհանեանի եւ այլոց մասին է:

Ձայնագրութեան մէջ Սասուն Խաչատրեան Վանեցեանին կը պատմէ, թէ ինչպէս արձագանգած է Քոչարեան, երբ տեսած է Միքայէլ Յարութիւնեանի հրամանը:

«Ինձ դատաւորը զանգեց, ով որ պիտի կալանքը տայ, մի քիչ վախեցած է, ասացի՝ նայի ողջ գործը, նայի, դուխով: Ասաց՝ պարոն Վանեցեան, մի հատ հիմքերը նայեմ, ասի՝ նայի հիմքերը, կը զանգես, կալանքը ուզես-չուզես պիտի տաս: Վորշեմ էդ կը փակի», կ'ըսէ Վանեցեան:

Ըստ ձայնագրութեան, Սասուն Խաչատրեան նաեւ կը յայտնէ, որ Եուրի Խաչատուրովն ալ կանչած են, «որպէսզի փակեն»:

«Խաչատուրովի հետ գործ չունենք, խայտառակ կը լինենք, չփակեք, սպասեք, պրծնի», կ'ըսէ Վանեցեան:

Հրապարակուած ձայնագրութեան համաձայն, Մասուն Խաչատրեան նաեւ կը յայտնէ, որ փաստաբան Վահէ Գրիգորեան գրառում կը կատարէ՝ բոլոր հարցերուն պատասխանելով. «Վահէն կը խօսայ որպէս փորձագէտ»:

Արթուր Վանեցեան, ըստ այս հրապարակուած ձայնագրութեան, անգամ մը եւս կը յորդորէ Եուրի Խաչատուրովի հարցով ուշադիր ըլլալ. «Ախպեր, խնդրում եմ, Խաչատուրովինը ուշադիր նայէք, չնայած վարչապետն ասում է՝ փակէք, բայց ռուսները»:

«Ինքը իրաւունք չունէր պաշտպանութեան նախարարի հրամանի հիման վրայ գործն օգտագործել: Այդ ժամանակ մենակ նախագահն ունէր նման հրաման ստորագրել», կ'ըսէ Մասուն Խաչատրեան:

Ուժային կառոյցներու երկու պաշտօնատարները հաստատած են, որ հեռաձայնային գրոյցը տեղի ունեցած է: Վանեցեան այս խօսակցութիւնը ունեցած է ժընեւ եղած ժամանակ:

«Ուզում եմ հաստատել, որ այդ խօսակցութիւնը մեր մասնակցութեամբ է, եւ շատ տարօրինակ է, որ գաղտնալսուել է ԱԱԾ տնօրէնի եւ ՅՔԾ պետի խօսակցութիւնը: Դա մտահոգիչ փաստ է, որի հետ կապուած կը լինի մանրակրկիտ քննութիւն, եւ կը պարզուի ձայնագրութեան աղբիւրը: Գլխաւոր դատախազութիւնում էլ արդէն յարուցուել է քրեական գործ եւ առաջիկայում կ'իմանանք մանրամասներ», նշեց Վանեցեան, երեքշաբթի օր Խաչատրեանի հետ միացեալ մամլոյ ասուլիսին ընթացքին:

Խօսակցութիւնը եղած է Քոչարեանի վերաբերեալ դատարանի յայտնի որոշումը կայացնելու օրը:

«Հաշուի առնելով այն հանգամանքը, որ դատարանին առջեւ կանգնած էին հանրապետութեան երկրորդ նախագահը եւ ՀԱՊԿ գլխաւոր քարտուղարը, պէտք է 100 տոկոս համոզուած լինենք, որ այդ գործունէութեան մէջ թերութիւն չկայ: Նման քննարկում մեր միջեւ կայացել է եւ եղել է զուտ իրաւաբանական քննարկում», ըսաւ Վանեցեան:

Վանեցեանը յայտնեց խօսակցութեան նախապատմութիւնը. ինք ստացած է հաղորդագրութիւն՝ փորձագիտական կարծիք ձեռքակալութեան հիմքերուն հետ կապուած, եւ այդ հաղորդագրութիւնը ուղարկած է ՅՔԾ պետին՝ պարզաբանում ստանալու համար:

«Ուզում եմ եւս մէկ անգամ շեշտել՝ մեր պայքարը շարունակելու ենք, եւ մեզ չի խանգարելու ոչ մի բան, որեւէ խոչընդոտ չի կարող լինել մեր գործում: Հայաստանից թալանուած գումարները վերադարձուելու են, մարդասպանները ձեռքակալուելու են», ըսաւ ան:

«Ռուսների հետ հազիւ ենք բարիշէլ, Խաչատուրովի խափանման միջոց ընտրէք ստորագրութեամբ չհեռանալը» խօսքը պարզաբանելով՝ Վանեցեան յայտնած է, որ «այո՛, գաղտնիք չէ, որ թաւշեայ յեղափոխութիւնից յետոյ որոշ շրջանակներ սկսել էին տարածել, որ Հայաստանում իրավիճակ է փոխուել, նոր իշխանութիւնները փոխում են արտաքին քաղաքական ուղղութիւնը: Այդ մտավախութիւնը կար մեր ռուս գործընկերների մօտ, որը հերքուել է»:

«Փաշինեան Կը Ձգտի Իր Յայտարարութիւններով Տապալել Լեւոնային Ղարաբաղի Հարցով Բանակցութիւնները» Կ'ըսէ Ալիեւ



Ազրպէյճանի նախագահ Իլհամ Ալիեւի կարծիքով Հայաստանի վարչապետ Նիկոլ Փաշինեան «իր հակասական յայտարարութիւններով» ամէն կերպ կը ձգտի տապալել Լեւոնային Ղարաբաղի տագնապի լուծման հարցով բանակցային հոլովոյթը: Այս մասին կը հաղորդէ «Ինթըրֆաքս-Ազրպէյճան»-ը՝ վկայակոչելով Ազրպէյճանի նախագահին կայքը:

Ալիեւ այդ մասին յայտարարած է Պաքուի մէջ ԵԱՀԿ-ի ընդհանուր քարտուղար Թոմաս Կրեմինկըրի հետ հանդիպումին ընթացքին:

Հանդիպումի ընթացքին քննարկուող հիմնական նիւթերէն մէկը եղած է ղարաբաղեան հիմնահարցի լուծումը:

Ալիեւ ընդգծած է, որ Հայաստանի նոր վարչապետ Նիկոլ Փաշինեան առաջին օրերէն հանդէս եկած է տագնապի լուծման հարցով «հակասական յայտարարութիւններով», եւ այդ յայտարարութիւնները «առնուազն զարմանք կը յառաջացնեն»:

Ազրպէյճանի նախագահը յայտարարած է, որ Լեւոնային Ղարաբաղի հետ բանակցութիւններ կատարելու Հայաստանի վարչապետին հնչեցուցած թեզը անընդունելի է:

Բացի առկէ, ան աննպատակայարմար կը նկատէ այն յայտարարութիւնը, թէ 7 շրջանները Լեւոնային Ղարաբաղի Հանրապետութեան մաս կը կազմեն: Այդ առնչութեամբ Ալիեւ ԵԱՀԿ-ին կոչ ուղղած է արձագանգելու «այդպիսի վտանգաւոր յայտարարութիւններուն»:

«Ալիեւ ընդգծած է, որ ընդհանուր առմամբ ազրպէյճանական կողմին մօտ կարծիք կը ստեղծուի, որ Փաշինեան ամէն ձեւով կը ձգտի տապալել բանակցային հոլովոյթը: Այդ պարագային ամբողջ պատասխանատուութիւնը կ'իյնայ հայկական կողմին եւ անձամբ Փաշինեանի վրայ», կ'ընդգծուի հաղորդագրութեան մէջ:

Ալիեւ նաեւ ԵԱՀԿ-ին կոչ ուղղած է չէզոք դեր չստանձնելու Հայաստանի ընթացիկ քաղաքական իրավիճակին առնչութեամբ:

Ազրպէյճանի նախագահը եւ ԵԱՀԿ-ի ընդհանուր քարտուղարը նաեւ քննարկած են շրջանային անվտանգութեան, ժողովրդավարութեան զարգացման, տնտեսական համագործակցութեան առնչուող հարցեր:

Յիշեցնենք, որ Հայաստանի վարչապետը բազմիցս յայտարարած է, թէ Արցախը պէտք է մաս կազմէ բանակցային հոլովոյթին:

ՄԻՋԱԶԳԱՅԻՆ

**«Իտլիպի ճակատամարտը Կարելի է Յետաձգել, Սակայն Ահաբեկիչներուն Հետ Համակեցութիւնը Անկարելի է»
Կ'ըսէ Լաւրենթեւ**

Ռուսիոյ նախագահի Սուրիոյ հարցով յատուկ պատուիրակ Ալեքսանտր Լաւրենթեւ յայտարարեց, թէ Իտլիպի մէջ ահաբեկչական խմբաւորումներուն հետ ճակատումը կարելի է յետաձգել, սակայն ինդիքը պետք է լուծուի, իսկ ահաբեկիչներուն հետ համակեցութիւնը անկարելի է:

Անդրադառնալով ժընեւի մէջ Ասթանայի հռոլովոյթի երաշխաւոր երկիրներուն՝ Ռուսիոյ, Թուրքիոյ եւ Իրանի ներկայացուցիչներուն Սուրիոյ հարցով ՄԱԿ-ի յատուկ պատուիրակ Սթեֆան տը Միսթուրայի հետ ժողովին՝ ան ըսաւ, թէ քննարկուած է Իտլիպի մէջ տիրող կացութիւնը:

«Ահաբեկիչներուն հետ խաղաղ համակեցութիւնը անկարելի բան մըն է, եւ պետք է շարունակել անոնց դէմ պայքարիլ, մինչեւ որ վերջ տրուի անոնց գոյութեան», նշեց ան:

Լաւրենթեւ յայտնեց, որ Ռուսիան եւ երաշխաւոր մնացեալ երկիրները իրենց կարելին կ'ընեն Իտլիպի հարցը կարելի եղածին չափ նուազագոյն վնասներով լուծելու եւ քաղաքայիններուն անվտանգութիւնը երաշխաւորելու համար:

**Ուաշինկթըն Կը Զգուշացնէ Թեհրանը Իրաքի Մէջ
Ամերիկացի Դիւանագէտներու Դէմ Յարձակում Գործելէ**

Միացեալ Նահանգներու իշխանութիւնները յայտնած են, որ իրաքեան Պասրա քաղաքին մէջ տեղի ունեցած անկարգութիւններուն, ինչպէս նաեւ ամերիկեան դիւանագիտական ներկայացուցչութեան դէմ յարձակման պատասխանատուութիւնը կը կրէ Իրանը:

«Տը Հիլ» կը նշէ, որ Սպիտակ տունը սպառնացած է Թեհրանին «արագ ու վճռական» պատասխան տալ՝ ամերիկացի դիւանագէտներու նկատմամբ հաւանական յարձակման պարագային:

Սպիտակ տան մամլոյ ծառայութեան յայտարարութեան մէջ մասնաւորաբար կը նշուի. «Միացեալ Նահանգներ իրենց քաղաքացիներու կեանքը պաշտպանելու համար դաժան ու վճռական պատասխան պիտի տան»:

«Վերջին քանի մը օրուան ընթացքին մենք ականատես եղած ենք Իրաքի մէջ տեղի ունեցող եւ մարդոց կեանքին սպառնացող յարձակումներու, որոնք ուղղուած եղած են Պասրայի մէջ Միացեալ Նահանգներու հիւպատոսութեան եւ Պաղտատի մէջ Միացեալ Նահանգներու դեսպանատան դէմ: Իրան որեւէ քայլ չէ ձեռնարկած կանգնեցնելու համար Իրաքի մէջ իր դրածոները, որոնց ելեւմտական օժանդակութիւն կը տրամադրէ, ինչպէս նաեւ զանոնք կը մարզէ եւ զենքով կը մատակարարէ», յայտարարած է Սպիտակ տունը:

Յայտնենք, որ 3 Սեպտեմբերին ի վեր իրաքեան Պասրա քաղաքին մէջ տեղի կ'ունենան զանգուածային անկարգութիւններ: Հազարաւոր ցուցարարներ կը կատարեն անժամկետ բողոքի ցոյցեր, որոնք կը վերածուին ապահովական մարմիններու հետ բախումներու: Անոնք իշխանութիւններէն կը պահանջեն բարելաւել ըմպելի ջուրի եւ էլեկտրականութեան մատակարարման առնչուած խնդիրները: Բացի ասկէ, անոնք դժգոհ են անգործութեան մակարդակէն ու ենթակառուցուածքներու ներկայ վիճակէն:

Նշենք, որ ցուցարարները նաեւ հրկիզած են Պասրայի մէջ Իրանի հիւպատոսարանը:

Իրանի արտաքին գործոց նախարարութիւնը Չորեքշաբթի օր յայտնեց, որ Պասրայի մէջ վերջերս արձանագրուած անկարգութիւնները շրջանին մէջ Միացեալ Նահանգներուն վարած քաղաքականութեան հետեւանքն են:

Միացեալ Նահանգներու Մէջ Անցեալ Տարուրնէ Ի Վեր Լոպիինկ Կատարող 21 Ընկերութիւն Աշխատած Է Թուրքիոյ Օգտին

Միացեալ Նահանգներու մէջ լոպիինկ կատարող տասնեակ մը ընկերութիւններ գումար կը ստանան Թուրքիոյ շահերը ներկայացնելու համար, որովհետեւ այդ երկրի տնտեսութիւնը կը տատանի ազգային դրամանիշի հետ կապուած ճգնաժամին եւ Թրամփի սահմանած մաքսատուրքերուն պատճառով:

Այս մասին կը հաղորդէ «Պլումպըրկ»-ը՝ ներկայացնելով Միացեալ Նահանգներու արդարադատութեան նախարարութեան՝ լոպիինկի հարցով բացայայտումներու մասին զեկուցումը:

Փաստաթուղթին համաձայն, թրքական կառավարութիւնը, քաղաքական կուսակցութիւններն ու այլ կազմակերպութիւններ աւելի քան 7,5 միլիոն տոլար ծախսած են յունուար 2017-էն մինչեւ այս տարուան գարուն երկարող ժամանակի ընթացքին Ուաշինկթընի մէջ իրենց շահերու ներկայացման համար:

Կը հաղորդուի, որ ընդհանուր առմամբ 21 ընկերութիւն բացայայտած է, որ անցեալ տարուրնէ ի վեր աշխատած է Թուրքիոյ օգտին: Այդ 21 ընկերութիւններէն 7-ն ներկայ պահուն աշխուժ համագործակցութիւն չեն վարեր:

Հրապարակուած բացայայտումներուն մէջ, սակայն, յստակ մատնանշումներ չեն կատարուիր, կը նշուի միայն ընդհանրական «Միացեալ Նահանգներ-Թուրքիա» յարաբերութիւններու կարգաւորման մասին:

Իբրեւ օրինակ կը նշուի «Մըրքըրի Փապլիք Աֆերզ» վերլուծական ընկերութիւնը, որ ներկայացուցած է թէ՛ Թուրքիոյ կառավարութեան, թէ՛ ալ անհատական առեւտուրի շրջանակներու շահերը, եւ այս տարի ընդհանուր առմամբ 177.600 տոլարի գումար ստացած է:

ՄԿՆԱՐԿ

Կեղրոնանալ Երկու Փուլերու Վրայ

Հայաստանի Հանրապետության Ազգային անվտանգության ծառայության տնօրենին եւ Յատուկ քննչական ծառայության պետին միջեւ կայացած հեռախօսազրոյցներու հրապարակումը աւելիով թեժացուց ներհասարակական մթնոլորտը: Կը թուի, որ շղթայական հակազդեցութիւններու շարքի դրսեւորումն է, որ տեղի կ'ունենայ այս օրերուն մեր երկրին մէջ:

Բնականաբար նախ եւ առաջ խիստ մտահոգիչ է, որ անվտանգության հետ կապուած հարցերու ծառայութիւններու գլխաւորները կը գաղտնալսուին. եթէ չհրապարակուէր նման ձայնագրութիւն, տրամաբանօրէն կրնանք ենթադրել, որ գաղտնալսումներն ու գաղտնաձայնագրումները շարունակուէին: Պատահարը մտածել կու տայ նաեւ մինչ այդ նման վերահսկողութիւն իրականացուած ըլլալու ենթադրութեան մասին:

Իրավիճակը յաւելեալ չթեժացնելու եւ ներհասարակական նոր լարուածութիւններու չառաջնորդելու համար նախ եւ առաջ կը մտածուի, թէ ո՛ր կեղրոնն է, որ նման գործողութիւն կը կազմակերպէ եւ ի՛նչ նպատակ հետապնդելու համար:

Օրէնքի գերակայութիւն դաւանած եւ իրաւական պետութիւն հիմնելու առաջադրանքով հանդէս եկող նորահաստատ իշխանութիւնները հարցը իրաւական հարթութեան վրայ շարունակել լուծելու վարքագիծը անշեղ պահելու խնդիր կրնան դիմակայել: Բնականաբար խորապէս մտահոգիչ կը նկատուի երկրորդ պետութեան ուրուականին գոյութեան համոզումը փոխանցող նման երեւոյթ մը:

Մառնասրտութիւն պահելու հրամայականը գերակշիռ է այստեղ՝ պետութեան շահի գերակայութիւնը ամէն առնուած քայլին հաշուարկելով: Մեր երկիրն ու պետութիւնը Եւրոպական խորհրդարանին մէջ ստացած են դրական գնահատական. զուգահեռ՝ ամէնէն խիստ շեշտադրումներով քննադատուած է պաշտօնական Պաքուն եւրոպական հակաարժեքային քաղաքականութիւն կիրարկելու պատճառով:

Մեր առաւելը մեր հակառակորդին եւ գնահատականը՝ Եւրոպայի կողմէ ըստ էութեան հիմնուած էր անարին յեղափոխութեան, ժողովրդավարական կանոններու յարգումին, փտածութեան դէմ պայքարի դրսեւորումներուն վրայ. ինչ որ կ'ենթադրուէր, որ պիտի արագացնէ Երեւան – Եւրոպական Միութիւն խորը եւ ընդլայնուած համաձայնագիրի վաւերացման գործընթացը: Այս մէկը ամէնէն հիմնական ուղղութիւնն է նաեւ մեր երկրի փոխլրացուցիչ արտաքին քաղաքականութեան եւ բազմակողմ դիւանագիտութեան: Տարածաշրջանին նկատմամբ ամերիկեան թափանցման քաղաքականութեան եւ միւս

կողմէ Ռուսիայէն կախեալութեան միջեւ եւրոպական ուղղութիւնը իրօք հաւասարակշիռ հանգամանք կրնայ ապահովել:

Այդ հանգամանքի իրացման համար անհրաժեշտ է շարունակել եւրոպական արժեհամակարգին ընդառաջ քաղաքական, իրաւական գործողութիւններով: Իսկ այստեղ ահա առաջին հորիզոնականը ժողովրդավար կարգերն են, մարդու իրաւունքներու յարգումը, արդարադատութեան ապաքաղաքականացումը, փտածութեան վերացումը, արդար, ազատ, թափանցիկ ընտրութիւններու կազմակերպումը:

Իշխանութիւններն ու իրաւապահ մարմինները պատահած զգայացունց իրականութեան դիմաց, հարցերու լուծման զուտ իրաւականութեան գիծերուն մէջ ինքնասահմանափակման հրամայականին առջեւ են, մեկնած՝ պետութեան գերակայ շահերէն: Պետական մտածողութիւնը չ'արտօներ խնդիրները քաղաքականացնել եւ որեւէ կերպ խնդրոյ առարկայ դարձնել արդարադատութեան անկախութիւնը:

Այս պատճառներով ալ Երեւանի քաղաքապետական ընտրութիւններուն ընդառաջ մեկնարկած նախընտրական արշաւի նիւթերը կեղրոնացնել Երեւանի խնդիրներուն, քաղաքացիներուն հարցերուն, քաղաքային եւ թաղային անլոյծ եւ առկախ մնացած հարցերու լուծման եւ ընդհանրապէս քաղաքաշինութեան հետ կապուած երեւոյթներուն վրայ: Հիմա է, որ առաւելաբար քաղաքացիական շարժումներու առաջ մղած խնդիրները պէտք է վերստին արծարծուին, քննարկուին, բանավէճերու ենթարկուին, քաղաքական բաղադրիչները ձգելով խորհրդարանական ընտրութիւններուն:

Արդար, ազատ եւ թափանցիկ ընտրութիւններու քաղաքակիրթ բառապաշարով ընթացող նախընտրական արշաւները մեծապէս դրական դեր կ'ունենան մեր երկրի ո՛չ միայն միջազգային հեղինակութեան բարձրացման, այլ նաեւ արտաքին փոխլրացուցիչ քաղաքականութեան իրացման համար կարեւոր ուղի հարթելով:

Յեղափոխութիւնը համակարգային փոփոխութիւն կ'իրականացնէ: Փուլ առ փուլ: Հիմա ընտրական համակարգը բիրեղացնելու եւ արդարադատութեան անկախութիւնը ամրագրելու փուլերն են: Իսկ այս առաջադրանքները կը բխին ինչպէս պետութեան, այնպէս նաեւ հասարակութեան շահերէն: Երկու ուղղութիւններու ճիշդ հունաւորումը մեր երկրի վարկին, տրուելիք հնարաւորութիւններուն եւ արտաքին քաղաքականութեան համար եւս կրնան լրջագոյն առաւելներ ապահովել:

«Ա.»

ԴԱՍԱԽՕՍՈՒԹԻՒՆ

Հովանավորությամբ՝
Թեմիս Բարեջան Առաջնորդ՝
Գերշ. Ս. Մասիս Եպս. Զօպույեանի

Կազմակերպությամբ՝
ՀՄԸՄ-ի Քուէրթի Մեկուսի Մասնաճիւղի Վարչութեան

Կը դասախօսէ
Սպահանի Թեմէն հիւրաբար ժամանած՝
Շահինշահիի Հոգեւոր Հովիւ
Գերպ. Տ. Անանիա Ծ.Վրդ. Գուճանեան
Նիւթ ունենալով՝
«ԵՐԻՏԱՍԱՐԴՈՒԹԵԱՆ ԴԵՐԸ ԵՒ
ՄՏԱՀՈԳՈՒԹԻՒՆՆԵՐԸ՝ 21-ՐԴ ԴԱՐՈՒ
ԱԶԳԱՅԻՆ ԵՒ ԵԿԵՂԵՑԱԿԱՆ ԿԵԱՆՔԷՆ ՆԵՐՄ»

Տեղի կ'ունենայ Կիրակի, 16 Սեպտեմբեր 2018-ին, երեկոյեան
ժամը 8:00-ին, Սբ. Վարդանանց եկեղեցոյ ներքնասրահին մէջ:

Կը հրաւիրենք մեր ժողովուրդի զաւակները, ի մասնաւորի
երիտասարդութիւնը, ներկայ գտնուելու եւ ունկնդրելու սոյն
շահեկան դասախօսութիւնը:

ԱՆՂՈՒՄՆԵՐ

Ուսանելի Օրինակներ

Դեմոկրատական Ֆրանսիան Տ. Ռուզվելթ 1932-ին ընտրուեցաւ Միացեալ Նահանգներու նախագահ՝ ապահովելով քուէներուն 57 առ հարիւրը: 1933-ին անոր երդման



արարողութեան ժամանակ աշխատաւորներուն մէկ չորրորդը անգործ էր եւ երկրին արտադրութիւնը 1929-ի Տնտեսական մեծ ճգնաժամին պատճառով նուազած էր կէսի: Ռուզվելթ ուզեց կացութիւնը դարմանել՝ առաջարկելով «Նիւ տիլ»ը, սակայն 27 Մայիս 1935-ին Գերագոյն դատարանը վճռեց, որ աստոր գլխաւոր կէտերէն մէկը՝ Ազգային ճարտարագիտութեան վերականգնման հրամանագիրը, գոր նախագահը ստորագրած էր 16 Յունիս 1933-ին, հակասահմանադրական է եւ ընդգծեց. «Արտակարգ կացութիւններ կրնան արտակարգ դարմաններ պահանջել, սակայն...արտակարգ կացութիւնները սահմանադրական լիազօրութիւն չեն ստեղծեր կամ ընդլայներ»: Այլ խօսքով, կան կարմիր գիծեր, որոնք, առնուազն ժողովրդավարական պետութեան մը մէջ կարելի չէ անցնիլ: Այս պատմական դրուագը ուսանելի դաս մը կը պարունակէ Հայաստանի Հանրապետութեան համար, որուն վարչապետը կ'ուզէ ժողովուրդէն թալանուածն ու ապօրինաբար կուտակուած հարստութիւնը ժողովուրդին ու

պետության վերադարձնել: Ան, Ռուզվելթի նման, ունի բարի կամեցողություն, սակայն առաջարկած «արտակարգ դարմանը» Հին Յունաստանի պատմութենէն ներշնչուած



անցումային դատարաններու ստեղծումը խիստ մտահոգիչ է ու վտանգաւոր, իրողութիւն մը, որ շեշտակի կերպով ընդգծուեցաւ վարչապետին՝ Երեւանի Դաւթաշէն շրջանին մէջ հանրահաւաքի ընթացքին կատարած յայտարարութիւններով: Այդ «արտակարգ դարմանը» վտանգաւոր ու մտահոգիչ է, որովհետեւ կ'ականահարէ պետութեան սահմանադրական կառոյցները՝ ժողովրդավարական պետութեան այն արդիական տարազը, որ արդիւնքն է մարդկութեան հազարամեայ փորձառութեան ու յառաջդիմութեան:

1990-ական թուականներուն Փերուի մէջ նախագահ Ալպերթօ Ֆուճիմորի եւ Վենեզուելայի նախագահ Հիւկօ Չաւեզ գոյութիւն ունեցող պետական կառոյցներու գործակցութեան բացակայութեան պատճառով շրջանցեցին զանոնք եւ ուղղակի կերպով դիմեցին ժողովուրդին՝ զանգատելով, որ այդ կառոյցները արգելք կ'ըլլան իրագործմանը իրենց բարի նպատակին: Անոնք ոստիկանութիւնը օգտագործեցին իրենց երկիրներուն խորհրդարանները փակելու եւ սահմանադրութիւնը բարեփոխելու համար: Երկու դէմքերն ալ վերածուեցան տխրահռչակ բռնատէրերու:

Պէտք է միշտ յիշել, որ դժոխքի ճամբան բարի ցանկութիւններով սալայատակուած է: Դժբախտաբար կարգ մը քայլեր պարզապէս կարելի չէ առնել, որքան ալ բարի ըլլայ անոնց նպատակը:

ՎԱՀՐԱՄ ԷՄՄԻԵԱՆ

ԼՈՒՐԵՐ ԳԱՂՈՒԹՆԵՐԷՆ

ՀՄԸՄ-ի 100-ամեակին Նուիրուած Քանատայի Շրջանի 48-րդ Մարզախաղերը

31 օգոստոսին Լաւալի մէջ տեղի ունեցաւ բացումը ՀՄԸՄ Քանատայի շրջանի 48-րդ մարզախաղերուն, որոնք նուիրուած էին ՀՄԸՄ-ի հիմնադրութեան 100-ամեակին:

Թեմի առաջնորդ Բարգէն արք. Չարեանի օրհնութեամբ, մարզախաղերուն մեկնարկը կատարուեցաւ ջահավառութեամբ՝ Լաւալի Հայոց ցեղասպանութեան յուշարձանին առջեւ, որմէ ետք ներկաները քայլարշաւով մը ուղղուեցան Լաւալի Հայ կեդրոն, ուր գործադրուեցաւ գեղարուեստական յայտագիր: Յաջորդաբար խօսք առին Լաւալի քաղաքապետարանի անդամ Արամ Էլակոզը ՀՄԸՄ-ի Լաւալի վարչութեան ատենապետ Սոնա Լախոյեանը, Քանատայի ՀՄԸՄ-ի Շրջանային վարչութեան ատենապետ Լիոնի Սարմազեանը եւ Քանատայի խորհրդարանի անդամ Ֆայսալ Խուրին, որ մեծ հպարտութիւն համարեց ՀՄԸՄ-ի հիմնադրութիւնը թէ՛ հայերուն եւ թէ՛ համայն մարդկութեան համար եւ կոչ ուղղեց հայ երիտասարդներուն, որ շարունակեն սիրել Հայաստանը, իրենց արմատները, իրենց արժանիքներն ու Քանատան եւ շարունակեն իրարու օգնել:

Աւարտին սրբազան հայրը շնորհաւորեց ներկաները՝ նշելով, որ այս խաղերը պարզապէս մարզախաղեր չեն, այլ՝ փառատօն եւ համախումբ աշխատանքի արդիւնք:

Մրցումները շարունակուեցան երեք օրերու վրայ, որոնց աւարտին տեղի ունեցաւ մրցանակաբաշխութիւն:

Փակման հանդիսութեան եւս յաջորդաբար խօսք առին՝ ՀՄԸՄ-ի վարչութեան ատենապետ Սոնա Լախոյեանը, Քանատայի ՀՄԸՄ-ի Շրջանային վարչութեան ներկայացուցիչ Լիոնի Սարմազեանը, Կեդրոնական վարչութեան անդամ Մոսիկ Թովուզեանը եւ Քանատայի մէջ Հայաստանի հիւպատոս Արա Մկրտիչեանը:

Նոյն օրը, երեկոյեան Լաւալի «Շերաթոն» պանդոկի սրահին մէջ տեղի ունեցաւ փակման խրախճանքը:

Արցախեան Շարժումի 30- ամեակի Եւ Լեռնային Ղարաբաղի Հանրապետութեան Հոչ ակման 27-ամեակի Նշում

Կազմակերպութեամբ ՀՅԴ Յունաստանի Հայ դատի յանձնախումբին, 3 Սեպտեմբերին Քոքինիոյ «Զաւարեան» կեդրոնին մէջ տեղի ունեցաւ արցախեան շարժումի 30-ամեակի եւ Լեռնային Ղարաբաղի Հանրապետութեան հոչակման 27-ամեակի նշում:

Կազմակերպիչ յանձնախումբին անունով Սերգօ Գոյումճեանը հայերէն եւ յունարէն լեզուներով ներկայացուց օրուան խորհուրդը՝ ամփոփ գիծերու մէջ տալով արցախեան

շարժումի շղթայագերծման եւ Լեռնային Ղարաբաղի Հանրապետութեան հռչակման պատմական քայլերն ու համազգային տարողութեամբ ձեռք բերուած նուաճումները, շեշտելով արցախեան հերոսամարտի ոգիով Հայ դատի պայքարը շարունակելու, Արցախի անկախութեան ամբողջական, միջազգային եւ իրաւական ճանաչումը նուաճելու անհրաժեշտութիւնը:

Ձեռնարկին ներկայ էին հիւրաբար Արցախէն ժամանած 23 պատանիներ եւ պարմանուհիներ, որոնք այս տարի եւս հիւրընկալուեցան «Խաճիքիփաթիօ» հաստատութեան կողմէ, ինչպէս նաեւ քանի մը օր անցուցին ՀՅԴ Յունաստանի պատանեկան միութեան բանակավայրին մէջ, որուն նիւթական հոգատարութիւնը ստանձնեց Յունաստանի Հայ կապոյտ խաչի Շրջանային վարչութիւնը: Նշենք, որ Յունաստանի Հայ դատի յանձնախումբը 22 տարիներէ ի վեր, ամէն ամառ, Աթէնքի եւ Սիրոս կղզիին մէջ կը հիւրընկալէ արցախեան ազատամարտին զոհուած հերոսներու որբացած երեխաներու խումբեր:

Օրուան պատգամը յղեց Միհրան Քիւրտոյլեանը, որ ամփոփ կէտերու մէջ ներկայացուց պատմականը Արցախի ազատագրութեան եւ Լեռնային Ղարաբաղի Հանրապետութեան ստեղծումին՝ գաղափարական շեշտադրումի արժանացնելով գլխաւոր դասերը արցախեան հերոսամարտին:

Այնուհետեւ Արցախի պատանիներու խումբին ընկերակցող պատասխանատու, Արցախի Հանրապետութեան կրթութեան, գիտութեան եւ մարմնակրթանքի բաժնի վարիչ Աննա Այվազեանը, ելոյթ ունենալով, ընդհանուր արժեւորումը կատարեց սփիւռքի զօրակցութեան՝ Արցախի հերոսական մաքառումին մէջ:

Ապա Արցախի փոքրիկները ներկայացուցին գեղարուեստական յայտագիր, որ կը բովանդակէր խմբերգներ, երգեր, ասմունքներ եւ պարեր:

Հանդիսութեան փակման խօսքը արտասանեց թեմի առաջնորդ Գեղամ արք. Խաչերեանը, որ Արցախի ազատագրութեան եւ սփիւռքի հայապահպանման պայքարները միեւնոյն մեծ պայքարին էական տարրերը հռչակելով՝ շեշտեց արցախեան պայքարին պատմակշիռ դասերը սերունդէ սերունդ փոխանցելու եւ ոգեւորելու հրամայականը: Սրբազանը իր գնահատանքի խօսքը ուղղեց յունահայութեան, որ սերունդէ սերունդ բոլորանուէր պայքարը կը շարունակէ յանուն հայապահպանման եւ Հայ դատի հետապնդման՝ յատկապէս գնահատելով ՀՅԴ Հայ դատի յանձնախումբին տարած աշխատանքը, ինչպէս նաեւ՝ Խաչիկ Խաչատուրեանին եւ բոլոր նուիրեալ անձերուն երկար տարիներու ճիգը, որ 20 տարիներէ աւելի կ'ապահովէն Արցախի փոքրերուն այցելութիւնը Յունաստան եւ Սիրոս:

Սրբազան հայրը նաեւ յունարէնով իր շնորհակալութիւնը յայտնեց «Խաճիքիփաթիօ» հաստատութեան, ինչպէս նաեւ՝ Սիրոսի քաղաքապետութեան, որոնք տարիներ շարունակ կը հիւրընկալեն Արցախի պատանիները: Ան նաեւ ընդգծեց, որ հայ եւ յոյն ազգը միակամ է եւ տարիներու բարեկամութիւնը, որ մշակուած է, պիտի ըլլայ տեւական, ուր որ ալ գտնուին՝ Յունաստանի, Հայաստանի, թէ Արցախի մէջ:

ԱՅԼԱԶԱՆ

Ինչպիսի՞ն է Ծնողք-Չաւակ Ձեր Կապը

Ընտրեցէք երեք հաւանական պատասխաններէն յարմարագոյնը եւ վերջաւորութեան իմացէք, թէ ինչպիսի՞ են ձեր եւ ձեր զաւկին միջեւ գոյութիւն ունեցող յարաբերութիւնները:

1

Յաճախ ձեր զաւակները ձեզ կը մեղադրեն, որ՝

- ա.- Անտեղի կը մտահոգուիք իրենց համար:
- բ.- Շատ հարցում կը հարցնէք իրենց մասին:
- գ.- Խստապահանջ էք:

2

Երբ ձեր զաւակը լուրջ դժուարութիւն մը ունենայ,

- ա.- Անմիջապէս ձեզի կը դիմէ, քանի որ իր սրտին խօսող լուծումներ կը գտնէք:
- բ.- Ձեզի կը դիմէ, քանի որ կը հանգստացնէք զինք:
- գ.- Ձեզի կը դիմէ, քանի որ շնորհիւ ձեզի՝ ամէն բան աւելի յստակ կը տեսնէ:

3

Ձեր զաւակը խռոված է...

- ա.- Հետը կ'առանձնանաք եւ բացատրութիւն կ'ուզէք:
- բ.- Կը սպասէք, որ հանդարտի եւ արտայայտուի:
- գ.- Ձեր թելերուն մէջ կ'առնէք եւ պատճառը կը հարցնէք:

4

Ձեր զաւակը դպրոցէն կը կախակայուի իր մէկ յանցանքին համար:

- ա.- Անմիջապէս դպրոց կը ներկայանաք եւ բացատրութիւն կը պահանջէք:
- բ.- Չայն կը կանչէք եւ կ'ուզէք լսել պատճառը:
- գ.- Առանց մանրամասնութիւնները լսելու՝ անկէ խոստում կ'առնէք, որ ուրիշ անգամ չկրկնէ:

5

Ձեր զաւակը դպրոցական քննութիւններու կը պատրաստուի:

- ա.- Ձեր բոլոր գործերը մէկ կողմ կը ձգէք եւ կողքին կը նստիք:
- բ.- Պէտք եղած ցուցմունքները կու տաք եւ հեռուէն կը հսկէք:
- գ.- Արդէն նախօրօք պատրաստած էք անոր աշխատանքի ժամանակացոյցն ու ծրագիրը, իրեն կը մնայ հետեւիլ ձեր ցուցմունքներուն:

6

Մինչեւ օրս պահած էք՝

- ա.- Ձեր զաւկին բժշկական տետրակը:
- բ.- Ձեր զաւկին առաջին բանաստեղծութիւնը:
- գ.- Ձեր զաւկին կաթի ակոսան:

7

Մայր դառնալով սորվեցաք՝

- ա.- Դատել եւ դատուիլ:
- բ.- Ինքնամոռաց դառնալ:
- գ.- Տկարանալ զաւկին դիմաց:

8

Մայրերու օրը մտքով կը կապէք՝

- ա.- փունջ մը ծաղիկի հետ:
- բ.- ընտանեկան ընթրիքի հետ:
- գ.- սրտաբուխ մաղթանքի հետ:

9

Ձեր զաւակը արդէն ձեզի հետ չ'ապրիր, բայց եւ այնպէս՝

- ա.- Իր սենեակը եղածին պէս պահած էք:
- բ.- Շաբաթական դրութեամբ հետը կը խօսիք:
- գ.- Տեսաբար ձեր կարծիքին կը դիմէ:

10

Եթէ խաղալիքի մը վերածուէիք, պիտի փափաքէիք ըլլալ՝

- ա.- Խոշոր արջուկ մը:
- բ.- Լեկոյի խաղ մը:
- գ.- Բառախաղ մը:

ԱՐԴԻԻՆՔ

– Եթէ ձեր պատասխաններուն մեծամասնութիւնը «ա» է, կը նշանակէ, որ ձեր զաւակը ձեր կեանքին ամբողջ իմաստն է, ձեր գոյութեան միակ պատճառն է: Հետեւաբար շատ բնական կը գտնէք, որ մէկ կողմ ձգէք ձեր փափաքներն ու երագները եւ ամբողջովին նուիրուիք անոր:

Ժամանակն է, որ քիչ-քիչ թելեր տաք անոր, որպէսզի սորվի ինքնաբաւ ըլլալ, իսկ դուք զբաղեցէք ձեր անձով, եղէք «անձնասէր», նաեւ՝ որպէսզի հետագային մեծ յուսախաբութիւններ չապրիք:

– Եթէ ձեր պատասխաններուն մեծամասնութիւնը «բ.» է, որպէս ծնող՝ ուստիկան չէք, չէք փափաքիր, որ ձեր զաւակը ձեզ դիտէ որպէս օրէնքներ ճշդող եւ արտադրող անձ, այլ կ'ուզէք, որ մօտենայ ձեզի, հանգիստ արտայայտուի իր դժուարութիւններուն մասին, ձեզի հետ բաժնէ իր վիշտն ու ուրախութիւնը: Ազատ կը ձգէք, որ կեանքի մէջ իր ընտրութիւնները կատարէ եւ իր անձնական թելերով թռչի:

– Եթէ ձեր պատասխաններուն մեծամասնութիւնը «գ» է, ձեր զակին դաստիարակութիւնը առաջնահերթ է ձեզի համար: Կը ջանանք անոր համար ստեղծել յարմար միջավայր եւ ճշդել օրէնքներ, որպէսզի ինքզինք կառուցէ եւ աւելի ուշ երախտապարտ ըլլայ ձեզի...

Զօրաւոր անհատականութիւն ունիք եւ նոյնիսկ ձեզմէ հեռու՝ կը փորձէք հակիլ անոր վրայ, քանի որ երեխան երեխայ կը մնայ ձեր աչքով:



ԽԱՉՎԵՐԱՑ

Ուրախութեամբ կը յայտնենք մեր համայնքի զաւակներուն, թէ Ուրբաթ, 14 Սեպտեմբեր 2018-ին, Խաչվերացի տօնին առիթով, Սր. Վարդանանց Եկեղեցոյս մէջ տեղի պիտի ունենայ հանդիսաւոր Ս. Եւ Անմահ Պատարագ:

Պատարագը պիտի մատուցէ, յաւուր պատշաճի քարոզէ եւ Ռեհանի օրհնութիւնը կատարէ

**Թեմիս Բարեջան Առաջնորդ՝
Գերշ. Տ. Մասիս Եպս. Զօպույեան**

Կոչ կ'ուղենք մեր հաւատացեալ ժողովուրդին մասնակից դառնալ այս առիթին՝ հաղորդուելու օրուան խորհուրդով:

Դիան Ազգային Առաջնորդարանի